

Saallicht geht aus.

An einem Tisch sitzen 5 wichtige Persönlichkeiten. Der Tisch wird von einem Lichtkegel von oben beleuchtet, der Hintergrund ist im Dunkeln.

Dr. Sheila / Dr. Helene / Prof. Dr. Günter / sein Assistent Juri / Dr. Ann-Kathrin

1.1 Vorstellungsrunde

- Dr. Günter Ich begrüesse euch alli do im Camp 182 in Zofige.
Min Assistent Juri übernimmt d'Protokollfüerig mit em neue
DigiLog.
- Juri (zieht ein kleines Gerät aus der Tasche und legt es auf den
Tisch.)
Datum: De 7. März 2035. (piip)
Ziit: Ponkt 07:45 Uhr. (piip)
Tag 1, Stond 0. (piip)
D'Uufnahm laufft. S'Protokoll wird in Ächtziit au euचे C-App
Account übermittlet.
- Dr. Günter Sehr guet.
Zom Afang wär's toll, wenn mir eus chorz wördid vorstelle. Das
schafft grad en gueti base för euse *team spirit*.
Also ich bi de Prof. Dr. Günter, de Chef vom Team. För wältwiits
Ufsehe han ich mit mim Buech «ohne Tugend keine Jugend»
gsorget.
- Dr. Ann-Kathrin Wenn ich mir an dieser Stelle eine Bemerkung erlauben darf,
Günter, einfach ein geniales Werk.
- Dr. Günter (nickt anerkennend)
Ich bin sozäge en Gründervater vo de Camps 182 i de Schwiiz
ond dromm sitt Afang debii. Froge?
- Dr. Sheila Guet, denn gib ich s'Wort a mini Stellverträterin Dr. Sheila.
Hallo.
Ich bin Dr. Sheila, Psychologin, spezialisiert of Therapie mit
bewosstsiis verändernde Droge. Mini Hobbies sind
Wasserskifahre, Wiehnachtsshopping im Nahe Oste ond ich
sammlе Musigkassette os de 70-er ond 80-er Johr.
- Juri De wievellti Zyklus im Camp 182?
- Dr. Sheila De zwölft.
- Juri Danke.
- Dr. Günter Denn gönd mir grad eis wiiter.
- Dr. Ann-Kathrin (voller Energie)
Vielen Dank, Günter.
Nun, ich bin die Ann-Kathrin, DIE Spezialistin auf dem Gebiet
der Bewusstseinsverändernden Gentechnik. Letzte Woche
wurde mir übrigens der Ehrendokortitel der Harvard University
verliehen.
- Juri Zyklus Nommere...?
- Dr. Ann-Kathrin 8.
- Dr. Günter Sehr schön. Ich gseh scho, ich leite es Team mit *potential*.
Helene, bitte.

Dr. Helene Dr. Helene. Wösseschafflerin im Gebiet vo de digitale Kommunikation. Die banale Netzwerk wie facebook ond whatsapp han ich zo dem gmacht, was sie hött sind – zom wichtigschte Läbes-Bestandteil.
Mini Hobbies sind bache, wellnesse ond e-Bike fahre mit Ökostrom os de eigne Garteabfäll.

Dr. Sheila Cool.
Juri Zyklus?

Dr. Sheila Ich bi ganz neu.
Juri Also de Erscht.

Dr. Helene Korrekt.
Dr. Günter Fählt nor no mini rächti Hand.
Juri Hallo. Ich bi de Juri.
Wo ich vor foif Johr sälber im Camp 182 gsii bin, hett mich Zuekonftsanalyse zom Dr. Günter brocht. Sett denn bin ich a sinere Siite ond ha's no kei Tag bereut. En onglaublich erföllendi Ufgab.

Dr. Günter Danke, Juri.
Du sprichsch vielleicht grad de Chärn vom Erfolg vo de Camps 182 a. Noch de Wirtschaftskrise im Johr 2025 isch die Wält am Abgrond gstande.

(Hintergrundlärm – die Jugendlichen in den Betten schlagen an die Bettgestelle.)

Dr. Ann-Kathrin Keine Arbeit.
Dr. Helene Kei Perspektive.
Dr. Sheila Kei Hoffnig.
Juri D' Jugend isch ufgstande...
Dr. Günter ...ond hett d'Wält welle os de Angle hebe.
Dr. Ann-Kathrin *No future!*
Dr. Helene *No money!*
Dr. Sheila *No life!*
Juri D' Armee händ müesse igriife.
Dr. Günter Schöss sind gfalle gäge die eignig Bevölkerig...
Dr. Ann-Kathrin ...gegen die eigenen Kinder!
Dr. Helene Tumult!
Dr. Sheila Chaos!
Juri Gewalt!
Dr. Günter (erhebt die Hand. Der Lärm verstummt augenblicklich.)
Aber denn sind Camps 182 igfüert worde. DIE ERFOLGSGSCHICHT!

1.2 Song

Backgroundmusik wird eingespielt.

Strophe 1

Wer du au bisch, was du wotsch wärde,
es gitt kei bessre Platz of Ärde,
denn s'Camp, das chönd mir garantiere
wird dini Zuekonft arrangiere.

Refrain

Camp, Camp, 1-8-2
(Background)
uh – uh – uh – uh

Camp, Camp 1-8-2

(Background)
die alti Wält wird ändlich neu.

Strophe 2

Jugendwalt, das isch mol gsii
Mit föfzäh simmer all debii
Bim zäme hebe, döre stoh
ond niemer wird eleige gloh.

Refrain

Camp, Camp, 1-8-2
(Background)
uh – uh – uh – uh

Camp, Camp 1-8-2

(Background)
die alti Wält wird ändlich neu.

1.3 Ausblick

Juri	Darf ich of Ziit hiwiise. Zimmer Z-480 ond Z-481 werdid i wenige Minute gweckt.
Dr. Günter	Danke, Juri, denn halt ich mich chorz: Ihr sind mir i dem Zyklus zo 100%-iger Loyalität verpflichtet. Ich verlange tadellosi ond korrekti Arbet. De nöchsch Karrieresprung wartet am Ändi vo dem Zyklus of jede vo eus – (Pause)
Dr. Ann-Kathrin	solang mir bi de Camp-Security mit perfekter Arbet uffalled. Günter, auf uns kannst du dich verlassen. Die Camp-Security wird nicht die kleinste Beanstandung finden.
Dr. Günter	So gänd mir enand d'Händ zom Start in erschte Arbeitstag. (reichen sich die Hände, sanfte Hintergrundmusik)

Dr. Günter

Jeder Tag ist ein neuer Anfang.

kleiner Umbau, ganz harmonisch
Alle gehen ab
LICHTWECHSEL

6 Jugendliche liegen in den Betten. Es sind dies Joy Schüpach, Xenia Gruber, Anna Roth, Lorena Gasser, Rakim Mayers und Ella

2.1 Durchsage (eingespielt)

Durchsage: Guten Morgen, Zimmer 480. Das Team unter der Leitung von Prof. Dr. Günter wünscht allen ein wunderbares Aufstehen. Der heutige Tag steht unter folgendem Leitsatz:

Jeder Tag ist ein neuer Anfang.
Jeder Tag ist ein neuer Anfang.

Es ist jetzt acht Uhr. Das Frühstücksbuffet ist noch bis halb zehn geöffnet. Das Programm beginnt für dich um zehn Uhr in Zimmer H17.

Das Leitungsteam lädt dich dazu ein, die Liste mit den Freizeitaktivitäten über das visual LAN vollständig auszufüllen.

Herzlichen Dank.

Xenia So hätt mich mini Mum au mol chönne wecke:
«Xenia, s'Zmorge stoht of em Tisch. Ich ruumes erscht am zähni
weder ab. Freu mich, wenn du uf chonsch.»

Rakim (dreht sich auf die andere Seite.)
Ella Wem seisch das. Ich ha immer elei müesse ufstoh. «Das erwartid mir
vo dir, Ella.»

Joy Han ich guet gschlofe. Guete Morge zäme.
Anna Morge Joy. Ich han immerhin es paar Stöndli gschlofe. Soscht bring
ich a frömde Ort keis Aug zue.

Rakim Rueh!
Joy Was isch denn mit dem los?
Lorena Rakim, hesch ned ghört: Jede Tag isch en neue Afang.
Also mit eme bessere Motto chönntid die 182 Täg gar ned afo.

Rakim (zieht sich das Kissen über den Kopf)
Xenia Scho no speziell. Verwachs ch amene frömde Ort. D'Schuel isch
fertig ond noch dene 182 Täg weisch genau, wie diis Läbe
wiitergoht.

Lorena Zom Glöck bin ich ned früener of d'Wält cho.
Joy Säg nüt. Vor de Jugenkrawäll im Jahr 2024 sind alli Jugendliche am
gliche Tag zor Schuel uus cho; irgend afangs Sommer. Sie händ sich
sälber müesse om en Lehrstell kömmere.

Lorena De totali Stress. Zom Glöck hett sich d'Gsellschaft wiiter entwickelt.
Ella Mir chömid mit 15-ni os de Schuel, diräkt is Camp 182 ond det wird
noch de beschte Lösig för eus gsuecht.

Anna Die letscht Oase vor em „Ärscht vom Läbe“.

Joy Mini Schwöschter isch vor zwoi Johr do gsii. Sie schaffet jetzt im Zoo Züri. Sie isch mega happy.

Xenia Wieso weisch du das? Normalerwiis isch de Kontakt zo de Aghörige doch gar ned erlaubt.

Joy Reine Zuefall. Bi me Zoobsuech han ich sie gseh d'Elefante fütterte.
Rakim Sorry, aber sälscht ime Land mit 12 Millione liwohner cha mer sich ned eifach so osem Wäg goh. Das muess jo sogar de Regierig klar sii.

Anna Guete Morge, Herr Mayers. Au wach?
Rakim Ich ha no gar ned gschlofe.
Xenia Was hesch denn du die ganz Nacht gmacht?
Rakim D' Matratze massiert.
Xenia Isch es de Abschied vo dehei?
Rakim (nickt zögerlich)
Lorena Ich weiss no gar ned, wie fescht ich mini Eltere werde vermisse.
Ella Also ich ha mini gern.
Joy Gha.
Ella Wie meinsch das?
Joy Dass du ihne no einisch wersch begägne isch eher onwahrschiinlich. Noch em Camp wirsch du neue Erwachsene zuteilt. Find dich also demit ab, dass du sie gern GHA hesch.

Anna Aber sie cha sie jo trotzdem es Läbe lang gern ha. Das schlüüst sich jo ned us.

Xenia Mini sind okay gsii, wenns emol deheim gsii sind. Aber das isch sälte vor cho. Shit happens.

Lorena Krass.
Mini sind voll okay gsii. Also, so richtig voll okay.

Rakim Mini au.
Ella Aber gäge Abschiedsschmerz ond Trännigsloch gitt's im Camp jo s'Freiziit Programm. Händ ihr of em Fingerpad scho alles usgföllt?

(alle formen ein spiegelverkehrtes L und scrollen sich durch die lange Liste)

Anna Ich bi eifach ned Entschloss freudig.
Lorena Os dem riisige Agebot öppis z'gfinde isch au gar ned eifach.
Joy Ich goh sicher zo de Archäologie, is Bache ond Möbel restauriere.
Lorena Ich sicher is Riite ond is Armbruscht schiesse.
Ella Bim Choche ond bim Joga bin ich 100 prozentig sicher. Wie vell Körs muess mer wähle?

Rakim Mindischtens 5. Stoht jo obe.
Anna Ich liebe Körsle, wenn s'Entscheide nor ned so schwierig wär.
Lorena Was isch denn das för en Frömdsproch im Kors 157? Kamasutra.

(die anderen lachen)

Joy Das isch d'Liebesbible os em alte Indie.
Lorena Ou, sorry.
Xenia (zu Rakim)
Und du?

Rakim «Langschlafen in stiller Umgebung» gitts leider ned.
 Anna Wie wärs mit Schlagzüüg?
 Xenia Wo?! Das han ich scho immer emol wälle.
 Ella Kors 215.
 Lorena Händ ihr Kors 327 gseh. Persönliche Läbesberotig bi nere Psychologin.
 Das bruucht doch keine.
 Joy Ond wenn?
 Lorena Du?
 Joy Nei, aber chönnt jo sii. Jede vo eus hett anders erläbt.
 Anna Was sägid ihr eigentlich zo de andere foif im Zimmer 481?
 Rakim i.o.
 Ella Die sind doch meh als in Ordning.
 Xenia Fend ich jetzt au.
 Rakim i.o. stoht för «*intergallaktisch okay*»
 Joy Isch dä vo dir?
 Rakim (lächelt ihr zu)

Die Tür geht auf und die anderen aus Zimmer Z-481 kommen herein.

2.2 Zimmer Z-480 mit Z-481

Michael Mörgeli, Mörgeli!
 Lorena Vo euch händ mirs jetzt grad gha.
 Gustav Zimmer 481 isch vollzählig bereit fürs Buffet.
 Grace Händ ihr au so guet geschlofe?
 Joy Frog jetzt jo ned de Rakim.
 Michael (geht zu ihm)
 Schnarchendi Fraue?
 Chantal Chomm jetzt ned scho wieder mit dem!
 Xenia Es isch ehner Trännigschmerz.
 Alicija Oh, a sensitive man.
 Anna Händ ihr d' Aktivitäteliste scho usgföllt?
 Gustav Ich bi fertig, wieso?
 Ella D'Uswahl isch eifach so riisig.
 Rakim Du muesch strategisch vorgoh.
 Ella Strategisch? Wie meinsch das.
 Rakim Die Lichte isch doch e Bestandteil för dini Zuekonftsanalyse.
 Xenia Rakim, wotsch ned zerscht einisch über das schlofe, wo jetzt grad use losch?
 Lorena Loh ihn doch la rede.
 Anna Du meinsch, das won ich jetzt wähle hett en Uswörkig of de Bruef, wo mir zuteilt wird?
 Chantal Das isch doch jetzt öppe jedem klar.
 Grace Ooops.
 Alicija Ich muess glaub s'Zmorge verschiebe.
 Xenia Wieso das?
 Chantal Striich eifach s'Kamasutra.
 Alicija Nei, ich ha nor os em Buuch entschiende. Ich muess verantwortigsbewosster a die Sach äne goh. Mini Zuekonft stoht of em Spiil.

Grace (nervös)
Mini au. Ich bin am zähni im H17. Bis denn!

(geht ab)

Anna Ich bin eh no ned fertig.
(zu Alicjia)
Möchid mirs zäme?

Alicjia Sorry, aber das muess ich mit mir sälber usmache. Ich bin im Z-481,
falls mich öpper suecht.

(geht ab)

Ella Das isch jetzt mega fies vo de Alicjia. Anna, sell ich dir hälfe?
Chantal Oder ich? Ich bin mega guet i dem.
Joy Ich weiss gar ned was ihr händ. Buuch-Entscheid sind doch immer
richtig.

Lorena Buuch isch vor allem es perfekts Stichwort. Ich ha mega Hunger.
Gustav Ich au. S'Gsetz vom Buffet isch gnadelos.
Lorena S'Gsetzt vom Buffet?
Gustav Je länger dass es offe isch, je weniger hett's.
Xenia Also los. Ab i d'Schlacht.

(alle gehen ab, nur Ella, Chantal, Anna und Rakim bleiben sitzen.)

2.3 Zimmer 480

Ella Wie chönd mir dir jetzt hälfe?
Chantal Machs strategisch: Überlegg dir, was du wotsch werde ond so
wählsch uus.

Rakim Wössid ihr was.
Ich muess mini erscht Nacht im Camp onbedingt mit eme Espresso
abe spüele.
(steht auf)
Nei, mit zwee. Oder nimm ich ächt besser e Latte Macchiato?
(kurz vor Abgang)
Strategisch isch öbrigens guet. Aber nie mit leerem Mage.
(geht ab)

Anna Ich ha mich no nie chönne entscheide.
Ella Gib mir schnell diin Code, damit ich dini Date of mim Fingerpad
gseh.

Chantal Hesch ned Hunger?
Anna Nei. Es isch mer schlächt.
Ella Gesch mer jetzt de Code.
Anna Mann!!! Was sell das Gstörm!?! Lönd mich doch eifach emol in
Rueh!

Chantal Aber...
Anna ...use!!!
Ella Schrei ned so omenand!
Anna Ich schreie gar ned! Ich rede nor luut!

Chantal Du hesch nüt im Buuch, ich kenne das.
Anna Sterne Cheib! Ich bruche kei Rotschläg, sondern Rueh! Isch das so
schwär zom Begriffe?
Ella Chantal, mir gönd. Ich loh mich doch vo dere ned so la behandle.
(zu Anna)
Lueg sälber wie z'rächt chonnsch!
Chantal (zu Ella)
Die heft nor Honger.
Ella Egal. Jetzt fress ich grad z'Leid s ganze Buffet leer.

(sie packt Chantal, beide gehen ab.)

UMBAU
Umbaumusik